
MOCIÓN DO GRUPO MUNICIPAL DE COMPOSTELA ABERTA PARA IMPULSAR DE FORMA URGENTE O PLAN MUNICIPAL DE XUVENTUDE E UNHA CONVOCATORIA DE PROXECTOS PARA DESENVOLVELOS NO CENTRO XOVE DA ALMÁCIGA

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte moción para o seu debate no Pleno:

EXPOSICIÓN DE MOTIVOS:

Numerosos factores conxunturais impactan actualmente na calidade de vida da mocidade. O exercicio do dereito á cultura sofre nun contexto pospandémico que suma trazos de crises concatenadas tinguidas de crecente desigualdade, minguando as expectativas da xente moza en ámbitos prioritarios para o colectivo como son a vivenda, a cultura, a formación, o traballo e a mobilidade.

Hoxe en día non temos datos sobre a porcentaxe de mozas/os en risco de vulnerabilidade social en Compostela, mais acreditamos que é necesario coñecer este e outros datos sobre a situación da mocidade e implementar políticas de apoio urgente sendo obrigado unha abordaxe integral para afrontar os novos grandes retos. Consideramos necesario apoiar unha liña de actuación integrada por políticas culturais expansivas, é dicir, que favorezan: o incremento de actividades diversas e gratuítas, o incremento das bonificacións para o fomento do consumo cultural e un apoio decidido a actividades e procesos de creación colectiva, sen esta orientación diminúa os orzamentos precisos para desenvolver unha política de xuventude simultánea en diferentes ámbitos estratéxicos como nas áreas de urbanismo, servizos sociais, desenvolvemento económico e mobilidade. Pensamos nunha planificación política que desborda departamentos estancos.

Dende un enfoque integral que teña en conta as súas prioridades, debemos posibilitar que a mocidade de Santiago sexa suxeito activo na construción da cultura municipal, favorecendo o seu acceso ao campo cultural, proceso en ocasións pechado por quen domina a entrada ao ámbito de representación cultural.

Hai exactamente un ano, Compostela Aberta preguntou en sesión plenaria cal foi o nivel de execución desagregado por partidas dependentes do Departamento de Xuventude, en data 14 de decembro do 2022. Transcorrido un ano reiteramos a mesma petición actualizada sobre o orzamento vixente e proximamente prorrogado para os 5 meses finais do mandato.

Lembramos aquí un acordo plenario do 7 de decembro do 2020 que recolle o seguinte texto: “O Pleno da Corporación insta ao correspondente órgano de goberno á elaboración, dotación orzamentaria e posta en marcha dun ‘Plan Municipal de Xuventude’ no que se impliquen transversalmente diferentes áreas do goberno municipal para poder dar conxuntamente resposta ás necesidades de emprego, vivenda, educación e acceso á creación cultural das mozas e mozos de Santiago de Compostela.”

No final do mandato do actual goberno nada sabemos do que acontece co Plan de Xuventude recollido por petición de Compostela Aberta nos orzamentos municipais. Recordámoslle ao goberno o pacto para viabilizar os vixentes orzamentos municipais asinado con Compostela Aberta, tamén queremos saber cales son os resultados efectivos da programación do Centro Xove da Almaciga —servizo ao que se dedican máis de 140.000€ anuais—. En numerosas ocasións trasladamos a crítica e denunciámos a falta de resposta as expectativas de colectivos de mozas e mozos de Santiago que non asumen o CXA como propio.

Na última rolda de prensa do concelleiro Rubén Prol —a que non tivemos acceso vía streaming, situación de falta de transparencia que contribúe ao apagón informativo que sufrimos— coñeciamos que a orientación para este curso 2022-23 que podemos definir como continuísta, non porosa ás críticas nin flexible, alérxica a introducir os cambios necesarios no servizo. O concelleiro non considera que sexa necesaria outra oferta formativa máis ambiciosa, actualizada, consensuada, de maior calidade e interese para a xente moza que a que presentou en rolda de prensa o día 18/10/2022 e que podemos consultar de forma concreta na web do CXA.

Atendendo a todo o anterior e agardando que o goberno atenda ás necesidades das mozas e mozos de Compostela, o Grupo Municipal de Compostela presenta á consideración do Pleno o seguinte

ACORDO:

- 1. Que o goberno facilite información escrita a todos os grupos municipais sobre o nivel de execución desagregado das partidas dependentes do Departamento de Xuventude.**
- 2. Que o goberno transparente por escrito unha folla de ruta do Plan de Xuventude onde especifique o desenvolvemento das próximas fases planificadas.**
- 3. Que o departamento de Xuventude publique unha convocatoria aberta de proxectos para desenvolver actividades e procesos culturais organizados por diferentes colectivos de mozas/os no Centro Xove da Almaciga durante o primeiro semestre do ano 2023.**
- 4. Que o goberno abra un dialogo cos colectivos de xente moza para elaborar un programa formativo consensuado e ambicioso que permita a entrada actualizada dos contidos formativos no Centro Xove da Almaciga.**

5. Que o goberno posibilite a publicación dun catálogo de recursos municipais para que a mocidade de Compostela poida planificar e desenvolver proxectos en rede aproveitando todo o territorio municipal sen esquecer o rural.

Santiago de Compostela, 13 de decembro de 2022

Branca Novo Rei



Branca Novo Rei
Concelleira do Grupo Municipal de Compostela Aberta

GRUPO MUNICIPAL

Á ATENCIÓN DO ALCALDE DE SANTIAGO